

Mensahe 12

**Ang Taghatag sa Mga Gasas
ug ang Mga Inug-umol sa Hinagiban sa Dios**

Basahong Kasulatan: Efe. 4:7-16; 6:10-20

- I. **Gipakita sa Efeso 4:7-16 kanato si Cristo nga taghatag sa mga gasas aron tiunayng matukod ang organicong Lawas ni Cristo; pinaagi sa paghatag, sa pagpaambit, sa diosnong grasya segun sa gidak-on sa gasas ni Cristo kining pagtukora:**
 - A. Kinahanglanon gyod nga gasas sa Lawas ang tanang bahin sa Lawas ni Cristo—v. 7; 1 Cor. 12:14-22; Rom. 12:4-5:
 1. Usa ka persona ang gasas ni Cristo nga naumolan sa Iyang kinabuhi ug elemento nga gipaambit kaniya sa Diosnong Trinidad—itandi sa 2 Cor. 1:15.
 2. Dunay sukod ang matag usa ka ginasahang tawo, ug gihatag o gipaambit kaniya ang diosnong grasya segun nianang sukora—Efe. 4:16; itandi sa Rom. 12:3.
 - B. Ang tiunayng pagtukod sa organicong Lawas ni Cristo pinaagi man sa paghatag sa mga tawong ginasahan, sama sa mga apostol, mga propeta, mga ebanghelista, ug mga magbalantay ug mga magtutudlo, nga naumolan sa pagpaambit sa Diosnong Trinidad, pinaagi ni Cristo nga Ulo diha sa Iyang pagkayab (lakip na sa Iyang pagkabanhaw), nganha sa Lawas ni Cristo—Efe. 4:8-12:
 1. Niingon ang Efeso 4:8, “Kay nikayab na man Siya sa kahitas-an, gipamihag Niya kadtong nangabihag ug nanghatag Siyag mga gasas sa mga tawo”:
 - a. Ang *kahitas-an* nga kinutlo sa Salmo 68:18 nagpasabot sa Bukid sa Sion (vv. 15-16), nga nagsimbolo sa ikatulong langit, nga gipuy-an sa Dios (1 Hari 8:30).
 - b. Nagpasabot ang Salmo 68 nga diha sa Arka nisaka ang Dios sa Bukid sa Sion human makadaog ang Arka (Num. 10:35); nagpakita kini giunsa pagdaog ni Cristo ug madaogong nikayab sa mga langit.
 - c. Tungod sa unibersoanong panag-ambitay ug diha sa pagkayab ni Cristo, gipamihag Niya kadtong nangabihag ni Satanas ug gihimo silang mga gasas sa Iyang Lawas—Efe. 4:8-11:
 - 1) Gipamihag ni Satanas ang tinubos nga mga balaan sa wala pa sila luwasa sa kamatayon ug pagkabanhaw ni Cristo—itandi sa Luc. 4:18.
 - 2) Sa pagkayab ni Cristo gipamihag Niya sila; sa ato pa, giluwass Niya sila gikan sa pagkabihag ni Satanas ug giangkong nga Iyaha—Sal. 68:18.

Mensahe 12 (sumpay)

- 3) Sa pagkayab ni Cristo gidala Niya sila sa mga langit ingog mga binihag Niya sa nagprosesyon nga Iyang mga kaaway nga binuntog ug gihimo silang mga gasa sa Iyang Lawas.
- 4) Nagsaulog si Cristo karon sa pagdaog Niya kanila, nga Iyang mga kaaway nga binuntog, ug gipamihag sila sa madaogong prosesyon diha sa lihok Niya aron matukod sa Iyang pagpangalagad ang Lawas Niya—2 Cor. 2:14.
2. Labi nga mokayab ug mokanaog si Cristo sa sulod nato, nga mobihag ug mobuntog nato, labi ta Niyang pun-on sa Iyang Kaugalingon aron maumol ta nga mga gasa alang sa Iyang Lawas—itandi sa Efe. 4:9-10.
- C. Ang tiunayng pagtukod sa organicong Lawas ni Cristo pinaagi man sa paghingpit sa mga tawong ginasakan sa mga balaan diha sa dios-nong pagpaambit aron makabuhat ang tanang balaan sa buhat sa pagpangalagad sa Bag-ong Tugon, sa ato pa, aron matukod ang Lawas ni Cristo—vv. 11-12:
 1. Gihingpit sa mga tawong ginasakan ang mga balaan sa pagtil-og kanila uyon sa kahoy sa kinabuhi nga may sangkap sa kinabuhi aron motubo sila sa kinabuhi—Gen. 2:9; 1 Cor. 3:2, 6.
 2. Gihingpit sa mga tawong ginasakan ang mga balaan nga mobuhat sa gibuhat nila aron direktang motukod sa Lawas ni Cristo—Mat. 16:18; Efe. 4:11-12; itandi sa 1 Tim. 1:16; 4:12.
 3. Ang resulta ning paghingpita mao nga modangat tang tanan sa pagkausa sa pagtuo ug sa hingpit nga pagkaila sa Anak sa Dios, sa pagkahingkod nga tawo, sa sukod sa gidak-on sa kahupnganan ni Cristo—Efe. 4:13; itandi sa Juan 17:23.
 4. Tungod ning paghingpita dili na ta magpabiling gagmayng bata nga kusokusohon sa mga balod ug ipalid sa tanang hangin sa pagtulon-an sa lipatlipat sa mga tawo, diha sa kaigmat sa tuyo nga magsistema sa kasaypanan—Efe. 4:14.
 5. Tungod ning paghingpita mahimong inugtukod nga bahin diha sa gugma ang tanang bahin sa Lawas ni Cristo—motubo ngadto sa Ulo ug molihok gikan sa Ulo—vv. 15-16.

II. Gipadayag sa Efeso 6:10-20 nga si Cristo ang mga inug-umol sa hinagiban sa Dios:

- A. Alang sa tibuok Lawas ni Cristo *ng hiniusang mag-aaway ang tibuok hinagiban sa Dios, dili alang sa tinagsang bahin sa Lawas*, makig-away gyod ta sa espirituhanong away diha sa Lawas, dili sa tinagsa—vv. 10-13; Sant. 4:7; itandi sa Rom. 13:12-14; Deut. 32:30.
- B. Sa Efeso 2 naglingkod ta uban ni Cristo sa kalangitan aron moambit sa tanan Niyang nahuman (v. 6); sa mga capitulo 4 ug 5 naggawi ta diha sa Iyang Lawas dinhi sa yuta aron matuman ang walay kataposang tuyo sa Dios (4:1, 17; 5:2, 8, 15); unya sa capitulo 6 nagbarog ta

ANG TAGHATAG SA MGA GASAG UG ANG MGA INUG-UMOL SA HINAGIBAN SA DIOS

Mensahe 12 (sumpay)

diha sa Iyang gahom sa kalangitan aron makig-away batok sa kaaway sa Dios (vv. 11, 13-14; itandi sa 1 Juan 5:4, 18; Juan 3:6b).

- C. “Busa magbarog mo, sa nabaksan na ninyo ang inyong hawak sa kamatuoran”—Efe. 6:14a:
1. Ang *kamatuoran* dinhi nagpasabot sa Dios diha ni Cristo nga realidad sa atong pagkinabuhi, sa ato pa, sa Dios nga nahimong realidad ug kasinatian nato sa atong pagkinabuhi; sa pagkatinuod si Cristo mismo kini nga atong gikinabuhi—4:15, 21, 24-25; Juan 14:6; 8:31-32, 36.
 2. Ang kamatuoran nga gibakos kanato sa pagkatinuod si Cristo man nga nasinati nato; kay gipahiuyon man ang pagkinabuhi ni Pablo sa sumbanan ni Cristo, duna siyay kusog nga moatubang sa tanang pagsupak ug lisod nga mga sirkumstansya—Efe. 4:20-21; Fil. 1:19-21a.
- D. “Nasul-ob na ang tabon-sa-dughan sa pagkamatarong”—Efe. 6:14b; 1 Cor. 1:30; Jer. 23:6:
1. Si Cristo nga tabon-sa-dughan sa pagkamatarong nagtabon sa atong konsensya, nga gitiman-an sa dughan; sa pakig-away nato batok ni Satanas, nga magsusumbong nato, nagkinahanglan ta sa konsensyang giputli sa dugo, sa konsensyang walay pagtuto—Heb. 9:14; 10:22; Buh. 24:16.
 2. “Gidaog nila siya tungod sa dugo sa Cordero” (Bug. 12:11); ang tubag nato sa mga pag-akusar ni Satanas mao nga, “Gidaog ko si Satanas, nga magsusumbong, dili pinaagi sa akong pagkahingpit ug dili man ngani pinaagi sa konsensyang walay pagtuto, kondili sa dugo sa Cordero; napanalipdan ko batok sa iyang mga pag-akusar pinaagi sa tabon-sa-dughan sa pagkamatarong.”
- E. “Nasapinan na ninyo ang inyong mga tiil sa lig-ong patukoranan sa ebanghelyo sa pakigdait”—Efe. 6:15:
1. Naghimog panagdait alang nato si Cristo didto sa krus, tali sa Dios ug sa tawo, ug nahimong ebanghelyo nato kining kadait; naestablisar na kini ingog lig-ong patukoranan, ingog pagkaandam nga masapinan ang atong mga tiil—2:13-17.
 2. Nakig-away ta sa espirituhanong pakig-away pinaagi sa pagbarog diha sa kadait; kon wala tay kadait tali sa Dios o tali ba nato ug sa ubang magtutuo, dili gyod ta makapakig-away—Col. 3:15.
- F. “Gawas ning tanan, sa nadala na ninyo ang kalasag sa pagtuo, nga magamit ninyo sa pagpalong sa tanang nagdilaab nga udyong sa daotan”—Efe. 6:16; 2 Cor. 4:13; Heb. 12:2:
1. Mga pagtintal, sugyot, pagduda, pangutana, bakak, ug ataki ni Satanas ang nagdilaab nga mga udyong; dad-on gyod nato ang kalasag sa pagtuo aron mapalong kining nagdilaab nga mga udyong.

Mensahe 12 (sumpay)

2. Gamiton gyod nato ang atong espiritu sa pagtuo uban sa nabuntog ug nabanhaw nga pagbuot nato aron motuo nga ang pagpadayag sa Ginoo mao ang paglaglag sa mga buhat sa yawa—1 Juan 3:8; Mat. 16:22-23; Luc. 4:39-41; Mat. 12:28; Luc. 10:17, 19.
 3. Gamiton gyod nato ang atong espiritu sa pagtuo aron motuo nga naglaglag ni Satanas ang kamatayon sa Ginoo—Heb. 2:14; Gen. 2:17; 3:15; Gal. 2:20; Rom. 6:3-6; 1 Cor. 15:54-58.
 4. Bansayon gyod nato ang atong espiritu sa pagtuo aron motuo nga nagpakaulaw ni Satanas ang pagkabanhaw sa Ginoo—Col. 2:12-15, 20; 3:1; Juan 14:30; Fil. 3:10; Isa. 61:10; Zac. 3:4-5.
 5. Bansayon gyod nato atong espiritu sa pagtuo aron motuo nga labaw pa sa gahom ni Satanas ang pagkabanhaw sa Ginoo—Efe. 1:19-23; 2:6; 6:11, 13.
 6. Motuo gyod ta sa Dios, nga tinuod, buhi, naa karon, ug naa kanunay—Mar. 11:22; Bug. 1:18.
 7. Motuo gyod ta sa kasingkasing sa Dios; maayo gyod kanunay ang kasingkasing sa Dios alang nato; dili Niya tuyo nga silotan, pasakitan, o mapildiha ta—Rom. 8:28-39.
 8. Motuo gyod ta sa pagkamatinumanon sa Dios; dili mamakak ang Dios, matinumanon hinuon Siya kanunay sa Iyang pulong—1 Cor. 1:9; 1 Juan 1:9; Tito 1:2.
 9. Motuo gyod ta sa kahimoan sa Dios—Efe. 3:20.
 10. Motuo gyod ta sa pulong sa Dios; obligado gyod ang Dios nga motuman sa tanan Niyang gipamulong—itandi sa 1 Tes. 5:24; Efe. 6:17-18.
 11. Motuo gyod ta sa pagbuot sa Dios—1:5, 9, 11.
 12. Motuo gyod ta sa pagkamagbubuot sa Dios; sa pagkamagbubuot Niya, bisan ang atong mga sayop makaayo man—Rom. 9:19-29.
- G. “Dawata ninyo ang salukot sa kaluwasan”—Efe. 6:17a:
1. Ang salukot sa kaluwasan alang man sa pagtabon sa atong salabotan, sa atong panghunahuna, batok sa negatibong mga hunahuna nga itiro sa daotan kanato; ang kaluwasan sa Dios kanang salukota, kanang tabona.
 2. Ipasulod ni Satanas sa atong salabotan ang mga hulga, mga kaguol, mga kabalaka, mga kahadlok, ug uban pang hunahuna nga makapaluya; ang kaluwasan sa Dios mao ang tabon nga magamit nato batok ning tanan, ug kining kaluwasana mao si Cristo nga nagluwas nga masinati nato sa inadlawng kinabuhi nato—Juan 16:33; Fil. 1:19; Rom. 5:10; 10:12-13.
- H. Dawata “ang espada sa Espiritu, ang Espiritu nga mao ang pulong sa Dios”—Efe. 6:17b:
1. Sa unom ka butang sa hinagiban sa Dios, ang espada sa Espiritu

ANG TAGHATAG SA MGA GASA UG ANG MGA INUG-UMOL SA HINAGIBAN SA DIOS

Mensahe 12 (sumpay)

ray gigamit nga isulong sa kaaway; pinaagi sa espada tagudtagoron nato ang kaaway.

2. Gisangkapan ta ni Cristo nga Espiritu ug pulong og espada nga hinagibang pang-asdang nga mopildi ug mopatay sa kaaway.
 3. Mahimo na nganing rhema (ang kasamtangan, dihadia, buhing pagpamulong sa Espiritu) ang logos (ang permanenteng pulong sa Biblia) alang nato, kini nga rhema mao ang espada nga motagudtagod sa kaaway—itandi sa Juan 6:63.
- I. “Pinaagi sa tanang pag-ampo ug pagpangamuyo, mag-ampo sa tanang panahon diha sa espiritu ug magtukaw alang niini sa tumang pagkamalahutayon ug pagpangamuyo alang sa tanang balaan”—Efe. 6:18:
1. Maisip ang pag-ampo nga ikapitong butang sa hinagiban sa Dios, kay kini man ang palagianan nga maaplikar nato ang ubang hinagiban.
 2. Ang pag-ampo maoy bugtong-talagsaong paagi aron maaplikar si Cristo nga hinagiban sa Dios; tungod man sa pag-ampo nga praktikal natong magamit ang hinagiban.